

Habemus Papam

Habemus Papam – tuet mer eus kund
es Ändi hät s Rätsle zu dere Stund,
wer isch es, wie heisst, wo chunnt er ächt här,
de Ma am Mikrofon tuet sich chli schwär,
es chroset im Sänder, doch endlich wird gsait,
dass de neu Pontifex Papst Franziskus heisst.

**De Name verpflichtet, isch Botschaft für all,
gönd zrug zu de Wurzle, zum Chind im Stall!**

Habemus Papam, still stoht er do,
„Hier bin ich, hier steh ich – chas au nit verstoh,
Buona sera , sait er, es Lächle im Gsicht,
„fratelli, sorelli,“ – de Bifall wird dicht,
de Funke isch gsprunge, wie mer cha gseh,
und d Stilli isch ächt bim „Pregate per me“!

**Bescheidenheit, das isch jetzt d Botschaft für all,
zrug zu de Wurzle, zum Chind im Stall!**

Habemus Papam – vertraut mit de Not,
vo de Arme und d Sorge um s tägliche Brot,
drum wünscht er Verzicht uf de Flug nach Rom
vo sine Landslüüt zur Installation
und bittet das Gäld für all die z verwände,
wo tagtäglich do stönd mit lääre Hände.

**E Chile für die Arme heisst d Botschaft für all,
zrug zu de Wurzle, zum Chind im Stall!**

Habemus Papam – und isch er au nett,
er hät sini Müeh mit em Hofetikett,
wohnt usserhalb vo de heilige Muure,
gedänkt nit als Eminänz drin z versuure,
meint:“Purpur und Schnick Schnack sind gar nüt
für mi,
de Carnevale isch längscht verbi“!

**Eifachheit luetet drum Botschaft für all
zrug zu de Wurzle, zum Chind im Stall!**

Habemus Papam – en Papst büxt us,
goht ohni en Bodygard schnell us em Hus,
passt so nit is Sicherheitsdispositiv,
vo de vatikanische Husdedektiv,
vertraut em Beschützer tүүf i sim Herz,
trieb mit de Gardische gern sini Scherz.

**Fürchtet euch nicht , isch d Botschaft für all,
zrug zu de Wurzle, zum Chind im Stall!**

Habemus Papam - en Ma mit Herz,
nöch bi de Lüüt, de Sinn himmelwärts,
ohni Berühriigsängscht, offe und schlicht,
eine wo d Lüt mit sim Lächle besticht,
wo d Herze öffnet und Wärmi schänkt,
au wenn s Frage git, wo n er andersch dänkt.

**Liebi zum Läbe isch d Botschaft für all,
zrug zu de Wurzle, zum Chind im Stall!**

Habemus Papam –wo Tabus bricht,
Zeiche setzt - nit über d Köpf ine spricht,
die Andersgläubige tүүf respektiert,
die um sich ume mit sim Biespiel brüskiert,
i chline Schritt, mit Chrafft und viel Muet,
anre Chile für alli baue tuet.

**Franziskus de Name, umfasst Botschaft für all,
zrug zu de Wurzle, zum Chind in Stall!**

Habemus Papam – er goht vora,
d Frag stellt sich nur - mag em d Kurie au na,
zumindescht i eim Punkt iifret s ihm na,
es paar lönd jetzt Luxuskarosse au stah,
bleibt z hoffe, sie gönd nit nur bi dere Reform
ir Chile mit ihrem Ma a de Spitze komform.

**Sie stönd i de Pflicht, eso wie mir all,
müend zrug zu de Wurzle, zum Chind im Stall!**

1. Juni 2013 Text und Musik Irma Matin